



Komunikadu Imprensa

29 Agostu 2019

Komunidade suku Loidahar preokupa ho kestaun asesu ba justisa : suspensaun ba pena prizaun, divórsiu, abandona, infantisídiu no kazu envolve membru governu

Iha 22 Agostu 2019, JSMP kontinua realiza treinamentu ba membru konsellu suku no comunidade iha Suku Loidahar, Sub-distritu Likisá munisípiu Likisá. Partisipante sira ne'ebé partisipa iha treinamentu ne'e hamutuk ema na'in 30 ne'ebé kompostu hosi mane 21 no feto 9 ne'ebé inklui ho ema ho defisienti nain 5. Partisipante sira ne'e mai husi konsellu suku, PAS, ema ho defisiénsia no membru comunidade Suku Loidahar.

Treinamentu ne'e ho objetivu atu hasae koñesimentu membru konsellu suku no comunidade sira inklui ema ho defisiénsia hodi hatene klean kona-ba demokrásia, kna'ar órgaun soberania sira iha prosesu halo lei no direitu asesu ba justisa formal iha Timor-Leste.

“JSMP fiar katak informasaun ne'ebé JSMP fornese durante treinamentu ne'e bele ajuda hariku koñesimentu membru konsellu suku sira liu-liu liga ho asuntu demokrasia, kna'ar orgaun soberanu partisipasaun públiku iha prosesu halo lei no direitu ema ho defisienti sira inklui lala'ok sistema justisa formal iha Timor-Leste,” dehan Diretór Interinu JSMP, Casimiro dos Santos.

Xefe Suku Loidahar Sr. Domingos dos Santos haktuir katak nia orgullu ho JSMP nia prezensa iha sira nia suku tanba bele fasilita fornese informasaun importansia sira ne'ebé liga ho demokrásia no justisa ba membru konsellu suku no comunidade sira.

Xefe suku ne'e husu ba partisipante sira atu fó atensaun másimu ba apresentasaun hosi JSMP, nune'e sira bele hatene kompeténsia saida mak lei atribui ba konsellu suku sira atu rezolve comunidade nia problema iha nível aldeia no suku.

Partisipante sira hato'o sira nia preokupasaun kona-ba maneira eduka família ho violénsia, autór ba krime violénsia doméstika mezmu ba hatán ona iha tribunál, maibé la hetan kastigu, nune'e kontinua repete sira nia hahalok, feen-la'en soe malu no abandonu, kazu soe bebe, inklui membru orgaun soberanu sira ne'ebé envolve iha krime maibé la hetan kastigu.

Hatan ba preokupasaun sira ne'e, JSMP klarifika katak hahalok ruma ne'ebé ofende ema seluk nia saúde fízika ka psíkika (ezemplu: baku, tuku, tebe, ku'u, rakut, ameasa no ka abandona ema ka labarik ne'e konsidera hanesan krime tuir ita nia lei penál. Satan hasoru ita nia membru família ne'e konsidera krime públiku. Se deit hatene tenke apresenta denúnsia ba autoridade competente atu prosesa kazu ne'e tuir justisa formál. JSMP mós esplika tan katak violénsia la'os maneira ne'ebé di'ak atu eduka ema, maibé ho liafuan ka maneira seluk ne'ebé la'os violénsia.

Kona-bá arguidu krime violénsia doméstika ne'ebé ba hatán ona iha tribunál maibé la ba kadeia no fila fali ba nia uma, JSMP esplika katak lei penál hatuur ona forma kastigu ka pena sira iha oin haat : pena prizaun, pena multa, pena traballu/servisu afavór ba comunidade no pena admoestasau. Ba pena prizaun iha artigu 68 Kodigu Penál (KP) fó dalan ba juis sira atu aplika suspensaun ba kastigu ne'ebé la aas liu tinan 3 kadeia. Signifika katak arguidu sei la ba kadeia no fila ba nia uma. Maibé períodu suspensaun nia laran, arguidu la bele komete tan kualkér krime. Bainhira arguidu komete tan krime, tribunál sei revoga suspensaun ne'e no haruka arguidu direktamente ba prizaun tuir pena ne'ebé antes ne'e tribunál aplika ona no prosesa kazu foun ne'ebé nia komete ka bele hanaruk tan períodu suspensaun.

Iha kazu sira feen-laen soe malu, tuir lei katak lei la bandu atu ema fahe malu/divórsiu. Maibé kuandu akontese divórsiu, tantu feen no la'en iha obrigasaun hanesan atu fó alimentasaun ba sira nia oan. Bainhira sira la fó alimentasaun ba menór sira, sira sei hatán ba krime ida la halotuir obrigasaun alimentár tuir artigu 225 Kódigu Penál.

Aleinde ne'e, kestaun kona-ba inan oho nia bebe hafoin partu maibé inan la hetan kastigu, JSMP esplika katak iha kazu balun inan ba kumpri kastigu ona iha prizaun. Maibé iha kazu balun susar teb-tebes atu hetan arguidu sira (feto no/ka mane) tanba dalabarak defisil atu buka tuir autór sira. Iha realidade comunidade sempre fó sala ba feto, sein konsidera no avalia kazu ida-idak ho detalla no komprehensiva.

Kestaun kona-ba membru orgaun soberanu sira ne'ebé iha imunidade bainhira komete krime, JSMP fo esplikasaun liga ho Artigu 16 Konstituisaun Timor-Leste ne'ebé garante kona-ba universalidade no igualidade. Signifika ema hotu-hotu hanesan iha lei nia oin, la haree ba nia seksu, orijin, estadu sivíl, pozisaun sosiál, ekonomiku, polítiku, ideolójia ka relijaun. Maibé konstituisaun rasik garante imunidade ba membru orgaun soberanu tanba sira hala'o servisu ba interese nasional. Ne'e la signifika sira livre hosi prosesu, sira sei hatán ba prosesu justisa tomak kontra sira, maske nia prosesu mak la hanesan ho kazu sira ne'ebé envolve comunidade bai-bain sira.

Atividade treinamentu ne'e, realiza tanba hetan apoiu finanseiru hosi Governu Austrália nia Embaxada iha Timor-Leste atraves hosi DFAT (Department of Foreign Affairs and Trade).

Atu hetan informasaun liután favor kontaktu:

Casimiro dos Santos
Diretór Interino JSMP
Diresaun e-mail: casimiro@jsmp.tl
Telefone: 3323883 | 77257466